

# Liñas de acción da CTNL

## para o período interasemblemable 2022-2023

(aprobadas na Asemblea Xeral ordinaria do 12 de marzo de 2022)

### Accións para o cumprimento dos fins da asociación

---

#### 1 Defender os intereses xerais das/dos traballadoras/es de normalización lingüística e da dignidade das condicións de traballo dos servizos lingüísticos:

- Realizar propostas que busquen **mellorar a situación do traballo en normalización lingüística**, nomeadamente na procura da estabilización dos servizos de normalización lingüística e demais departamentos técnicos existentes, propor a creación e a mellora de axudas para o mantemento, a creación e o reforzo de servizos de normalización lingüística nas administracións locais e facer un seguimento das convocatorias xa publicadas.
- Informar de forma xenérica da lexislación sobre o proceso de estabilización de persoal interino nas administracións públicas, no que afecte a técnicos/as de normalización lingüística.
- Dirixirse ás universidades para solicitarlles que retomen as prácticas de alumnado en servizos de normalización lingüística.
- Continuar a **difundir o traballo que se desenvolve a prol do galego**, procurando así que o labor a favor da lingua se vexa socialmente como útil e necesario. Para isto continuarase a difusión e información a través do web e redes sociais do traballo de SNL, ENDL, asociacións, empresas, etc., publicando novas, reportaxes, entrevistas, etc. Tentarase divulgar especialmente o **labor de planificación lingüística** co fin de que se coñezan mellor as diferentes etapas do traballo técnico de normalización da lingua e de que se recoñezan a complexidade e a necesidade deste traballo. En relación con esta tarefa naceron en 2019 os Premios Mil Primavera, que teñen entre os seus obxectivos a difusión do traballo de normalización da lingua.



- Como complemento do [Manual de procesos selectivos para técnicos/as de normalización lingüística](#), publicado en xaneiro de 2021, finalizar unha **proposta de temario específico para prazas de técnico/a de normalización lingüística** que inclúa ademais **exemplos de probas, especialmente das probas prácticas**, adaptado todo á realidade do traballo de normalización da lingua. Buscarase despois que institucións que teñen capacidade para influír nas entidades que convocan as prazas recoñezan e asuman a proposta.

Con esta proposta búscase máis unificación nos procesos selectivos, evitar convocatorias pouco adaptadas á realidade do traballo de normalización da lingua e facilitar tanto a preparación das probas por parte dos/das candidatos/as coma o traballo dos membros dos tribunais de selección.

## **2 Promover a formación continua no eido da normalización da lingua:**

### **ORGANIZACIÓN DE ACCIÓNS FORMATIVAS PARA O TRABALLO EN NORMALIZACIÓN LINGÜÍSTICA**

Cada ano a CTNL procura organizar algunha actividade formativa sobre diversas materias na procura de mellorar os coñecementos e as capacidades das persoas que traballan en normalización lingüística en diferentes ámbitos. Neste 2022 desenvolverase un curso ou obradoiro con algún dos seguintes contidos:

| <b>Obradoiro de planificación e avaliación a partir da educación social</b> |                                                                                                                                                                                                                                                                                                                                                                                                        |
|-----------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>Obxectivo xeral</b>                                                      | <ul style="list-style-type: none"><li>• Coñecer as bases teóricas e as metodoloxías da educación social para empregarlas na planificación e na avaliación das accións de normalización lingüística.</li></ul>                                                                                                                                                                                          |
| <b>Obxectivos específicos</b>                                               | <ul style="list-style-type: none"><li>• Achegar unha visión panorámica dos procesos de planificación e avaliación de accións.</li><li>• Fornecer unha bibliografía básica recomendable.</li><li>• Abordar de xeito teórico e práctico a detección de necesidades, o proceso de planificación e a súa metodoloxía, as fases e niveis de planificación, os recursos, os/as destinatarios/as, a</li></ul> |



|                         |                                                                                                                                                                                                                                                                                                                                                                                                |
|-------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
|                         | <p>temporalización etc.</p> <ul style="list-style-type: none"><li>• Expor de xeito práctico diferentes modelos de planificación e avaliación e o seu posible rendemento para o traballo dos servizos de normalización da lingua.</li></ul>                                                                                                                                                     |
| <b>Destinatarios/as</b> | <ul style="list-style-type: none"><li>• Traballadores/as de servizos de normalización lingüística (SNL).</li><li>• Traballadores/as de empresas, asociacións e outras entidades relacionadas coa normalización da lingua.</li><li>• Membros de equipos de normalización e dinamización da lingua do ensino.</li><li>• Persoas interesadas en traballar pola normalización da lingua.</li></ul> |
| <b>Duración</b>         | Entre 5 e 10 horas                                                                                                                                                                                                                                                                                                                                                                             |
| <b>Profesorado</b>      | Educador/a social con experiencia neste tipo de formacións                                                                                                                                                                                                                                                                                                                                     |

### Obradoiro de comunicación de argumentos no ámbito empresarial

|                         |                                                                                                                                                                                                                                                                                                                                                                                                                                                                                                     |
|-------------------------|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>Obxectivos</b>       | <ul style="list-style-type: none"><li>• Analizar diferentes argumentos para asociar a lingua con intereses e vantaxes no ámbito comercial e empresarial</li><li>• Coñecer as estratexias de comunicación máis valoradas no ámbito empresarial</li><li>• Elaborar un argumentario que axude a introducir a lingua a canda outras vantaxes de comunicación no ámbito comercial e empresarial</li><li>• Desenvolver estratexias de comunicación orientadas ao sector comercial e empresarial</li></ul> |
| <b>Destinatarios/as</b> | <ul style="list-style-type: none"><li>• Traballadores/as de servizos de normalización lingüística (SNL).</li><li>• Traballadores/as de empresas, asociacións e outras entidades relacionadas coa normalización da lingua.</li><li>• Persoas interesadas en traballar pola normalización da lingua.</li></ul>                                                                                                                                                                                        |
| <b>Duración</b>         | Aproximadamente 10-12 horas                                                                                                                                                                                                                                                                                                                                                                                                                                                                         |
| <b>Profesorado</b>      | Persoas con perfil adecuado para desenvolver o obradoiro.                                                                                                                                                                                                                                                                                                                                                                                                                                           |

| <b>Obradoiro de xestión de iniciativas de normalización lingüística</b> |                                                                                                                                                                                                                                                                                                                                                                                                     |
|-------------------------------------------------------------------------|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>Obxectivos</b>                                                       | <ul style="list-style-type: none"> <li>• Coñecer os pasos para xestionar e desenvolver accións de normalización lingüística.</li> <li>• Abordar de forma práctica a xestión e desenvolvemento de accións concretas de normalización lingüística.</li> <li>• Aprender a presentar os proxectos de normalización lingüística.</li> </ul>                                                              |
| <b>Destinatarios/as</b>                                                 | <ul style="list-style-type: none"> <li>• Traballadores/as de servizos de normalización lingüística (SNL).</li> <li>• Traballadores/as de empresas, asociacións e outras entidades relacionadas coa normalización da lingua.</li> <li>• Membros de equipos de normalización e dinamización da lingua do ensino.</li> <li>• Persoas interesadas en traballar pola normalización da lingua.</li> </ul> |
| <b>Duración</b>                                                         | Aproximadamente 10-12 horas                                                                                                                                                                                                                                                                                                                                                                         |
| <b>Profesorado</b>                                                      | Docente con experiencia neste tipo de formacións                                                                                                                                                                                                                                                                                                                                                    |

Unha acción formativa pensada non só para novos técnicos/as, senón tamén para **dar a coñecer o labor de normalización da lingua a outros colectivos diversos** que están en contacto cos SNL:

| <b>Curso de formación sobre o proceso de normalización: norma... que?, servizo de que?</b> |                                                                                                                                                                                                                                                                    |
|--------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------|
| <b>Obxectivo xeral</b>                                                                     | <ul style="list-style-type: none"> <li>• Dar a coñecer a diferentes colectivos en que consiste o traballo de normalización lingüística e o labor que desenvolven os SNL.</li> </ul>                                                                                |
| <b>Destinatarios/as</b>                                                                    | <ul style="list-style-type: none"> <li>• Estudantado ou persoas graduadas que teñan interese en traballar neste campo</li> <li>• Estudantado en xeral que estea a buscar posibles futuros laborais</li> <li>• Novo persoal de servizos de normalización</li> </ul> |



|                                                          |                                                                                                                                                                                                                                                                                                                                                                                                                                                                                                             |
|----------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
|                                                          | <ul style="list-style-type: none"><li>• Profesorado</li><li>• Responsables políticos</li></ul>                                                                                                                                                                                                                                                                                                                                                                                                              |
| <b>Contidos</b>                                          | <ul style="list-style-type: none"><li>• Para que serve a lingua?</li><li>• Paga a pena normalizar o galego?</li><li>• Onde están os principais atrancos?</li><li>• Existe algunha obriga legal para que as administracións interveñan?</li><li>• Que axentes están pulando pola lingua?</li><li>• Que son os servizos de normalización?</li><li>• Onde están dos SNL?</li><li>• Que podemos agardar dun SNL? Que servizos podemos atopar?</li><li>• Repaso dun abano de proxectos que desenvolven</li></ul> |
| <b>Metodoloxía</b>                                       | <ul style="list-style-type: none"><li>• Curso breve, concreto, directo ao gran. Sen moita teoría. Diseñado en función do público.</li><li>• Completarase con compilacións de sitios onde atopar información para afondar en cada parte, á medida do que cada colectivo poida requirir</li><li>• Posibilidade de facelo en liña e en dous formatos: autoformación (Moodle) e formación con docente/s (máis completo, con actividades prácticas).</li></ul>                                                   |
| <b>Outras circunstancias que poden favorecer o éxito</b> | <ul style="list-style-type: none"><li>• Acordo con forzas políticas para que se comprometan a inscribir algunha persoa participante.</li><li>• Acordo coa SXPL para que divulgue e anime o profesorado a asistir (ou o seu funcionariado).</li><li>• Acordo cos movementos de renovación pedagóxica para que animen o profesorado a asistir</li><li>• Créditos e homologación: créditos para o estudantado e homologación da formación para o profesorado</li></ul>                                         |

Procurarase tamén **recuperar unha xornada técnica, práctica e propositiva** a semellanza do curso de dinamización lingüística *Traballando en lingua* que adoitaba ter lugar en Carballo. Intentarase buscar a colaboración de entidades locais e universitarias.

## DOCUMENTOS FORMATIVOS E INFORMATIVOS

- Publicación dunha proposta de temario para prazas de TNL
- Publicación e difusión a través da rede de materiais formativos de cursos da CTNL.

## 3 Propostas para facer máis efectivo o traballo a prol da normalización da lingua e colaboración en accións para o fomento do galego:

### ACCIÓNS PARA UNHA MELLOR E MAIOR IMPLICACIÓN DAS ADMINISTRACIÓNS PÚBLICAS NO PROCESO DE NORMALIZACIÓN LINGÜÍSTICA

- **XUNTA DE GALICIA:** facer un seguimento da política lingüística da Xunta de Galicia, instándoa a que procure avances en vez de retrocesos, denunciando os pasos atrás que se dean e os pasos adiante que se deixen de dar e propondo melloras no desenvolvemento de proxectos e accións para o fomento do uso e prestixio da lingua galega.
- **ADMINISTRACIÓN LOCAL:** facer un seguimento das convocatorias de axudas das deputacións provinciais para a creación de SNL e tamén das convocatorias de prazas en concellos e entidades locais ao abeiro ou non destas axudas; manter xuntanzas cos responsables das áreas de normalización lingüística das deputacións provinciais para que promovan a creación e consolidación dunha rede de SNL nas entidades locais da provincia.

## ENCONTROS, XORNADAS E OUTRAS PROPOSTAS DE COORDINACIÓN

| <b>LGx15 (<a href="https://lgx15.gal/">https://lgx15.gal/</a>)</b> |                                                                                                                                                                                                                                                                                                                                                                                                                                                                                                   |
|--------------------------------------------------------------------|---------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>Descrición xeral</b>                                            | Organización dunha xornada de exposición de ideas que teñan que ver co futuro da lingua, na que interveñan persoas que transmitan, dun xeito breve e visual, ideas que poden, e queren, influír no futuro do uso e prestixio do galego e/ou nas actitudes e comportamentos lingüísticos de persoas ou entidades, procurando accións e cambios. Esas intervencións, ideas e propostas serán tamén gravadas e difundidas en vídeo a través da rede, nun formato semellante ao das conferencias TED. |
| <b>Obxectivos</b>                                                  | <ul style="list-style-type: none"> <li>• Recoller e difundir ideas para mellorar o futuro do uso e prestixio da lingua.</li> <li>• Realizar e difundir vídeos breves para a transmisión desas ideas.</li> <li>• Procurar influír no futuro do uso e prestixio do galego e/ou nas actitudes e comportamentos lingüísticos de persoas ou entidades, procurando accións e cambios, a través da transmisión de ideas e mensaxes de persoas.</li> </ul>                                                |
| <b>Destinatarios/as</b>                                            | <ul style="list-style-type: none"> <li>• Persoas interesadas no futuro da lingua (na sesión presencial) e, ademais, tamén público máis xeral (coa difusión dos vídeos).</li> </ul>                                                                                                                                                                                                                                                                                                                |
| <b>Duración</b>                                                    | Unha tarde ou tarde-noite (arredor de 3 horas).                                                                                                                                                                                                                                                                                                                                                                                                                                                   |
| <b>Formato</b>                                                     | Intervencións individuais cun tempo máximo (15 min.), claras e visuais, sen preguntas, e sen uso de mesa nin atril.                                                                                                                                                                                                                                                                                                                                                                               |
| <b>Lugar</b>                                                       | Nun auditorio por determinar.                                                                                                                                                                                                                                                                                                                                                                                                                                                                     |
| <b>Persoas que interveñen</b>                                      | Persoas que teñan algo que dicir, ideas que valla a pena compartir e transmitir para influír no futuro da lingua, e que teñan capacidade para comunicar de xeito claro, positivo, apaixonado, visual e breve, coa vontade de intentar mudar cousas. A busca ou selección de persoas e propostas faraa a CTNL.                                                                                                                                                                                     |
| <b>Notas sobre a xestión</b>                                       | Desde a CTNL nomearase unha comisión encargada da organización, selección de persoas, xestión, etc.<br>Non se pagará polas intervencións.<br>Poderá cobrarse unha entrada para asistir ao evento que axude a financiar, en parte, o equipo técnico necesario, as gravacións, a difusión, etc.                                                                                                                                                                                                     |

- **ENCONTROS PARA A NORMALIZACIÓN LINGÜÍSTICA:** colaboración cos XXIV Encontros para a normalización lingüística, organizados desde o CDSG do Consello da Cultura Galega (no outono de 2022).



- Organizar un **encuentro lúdico** para conmemorar os 25(+1) anos da CTNL.

## ACCIÓNS DE FOMENTO DO GALEGO

- **Resolución da terceira edición dos Premios Mil Primaveras a proxectos de posta en valor e fomento do galego (<https://milprimaveras.gal/>) e convocatoria dunha cuarta edición**

Tras a primeira convocatoria destes premios en 2019 (convocatoria en abril, resolución dos premios en xuño e acto de entrega en setembro), continuouse coa segunda edición entre 2020 e 2021, e convocouse unha terceira entre 2021 e 2022. O prazo de inscrición acabou o 31 de xaneiro de 2022 e neste momento o xurado está a valorar os proxectos. Esperamos ter a resolución antes da Semana Santa e a entrega de premios, antes do verán.

Na terceira edición a participación baixou moito (23 proxectos presentados) e valoramos facer cambios na cuarta edición que favorezan a participación de proxectos xa presentados. Algunhas das propostas de modificación:

- Simplificar categorías e reducir número de premios
- Facilitar e incentivar a presentación de proxectos en anos sucesivos, de acordo coa valoración do xurado.
- Mellorar a comunicación.
- Modificar as datas da convocatoria.

Para o seu financiamento solicitarase de novo axuda á Deputación Provincial de Pontevedra a través da súa liña de subvencións a asociacións para desenvolver accións de normalización lingüística.

- **Agasallo, afianzamento da nova etapa**

A finais de 2021 modificouse a xestión deste proxecto con varios cambios: deixou de actualizarse o web (que aínda segue público), actualizouse a imaxe gráfica e creouse unha conta nova na rede Instagram. A partir deste momento o proxecto céntrase só nas redes sociais ([Facebook](#), [Twitter](#) e [Instagram](#)) procurando unha xestión máis áxil.



Durante o ano 2022 continuarase con esta nova etapa, procurando aumentar os/as seguidores/as. Tamén se seguirá con sorteos do material que hai en stock e de novo material que se poida solicitar ás empresas participantes.

En outubro de 2022 caduca o aloxamento e o dominio do web <https://agasallo.eu> e valorarase suprimilo e manter o proxecto só nas redes sociais.

## RENOVACIÓN DO WEB DA CTNL

O actual web da CTNL ten xa case 15 anos e precisa unha actualización para adaptalo aos dispositivos móbiles e facilitar a publicación de novas. Cómpre acometer esta actualización neste ano ou no seguinte, para o cal se buscará financiamento.

Intentarase simplificalo e modernizalo, mantendo os contidos e os formularios necesarios para o funcionamento da asociación.

## Algunhas propostas organizativas para 2022-2023

---

- Mantemento da cota dos/as socios/as como nos últimos anos, sen ningún incremento (a cota xeral é de 25 € anuais e a de desempregados/as e estudantes de 15 €).
  - Renovación do **seguro de responsabilidade civil**.
  - Posta en marcha de **grupos de traballo** para o desenvolvemento dos diversos proxectos programados.
  - Preparación de enquisas ou consultas aos/ás socios/as para que poidan participar máis nas decisións e nos proxectos da asociación.
  - Procura de renovación de convenios e acordos de colaboración con outras entidades para o desenvolvemento dalgunhas das accións.
  - Solicitar ser entidade **socia amiga de Alingua**, Asociación de Entidades Locais pola Lingua Galega.
  - Nas comisións e plataformas das que a CTNL forma parte seguiranse facendo propostas en positivo e procurando que sexan o máis plurais e representativas posible, e que a través delas se dea voz, participación e protagonismo a persoas e entidades varias e de distinto ámbito e perfil a prol da normalización lingüística.
- Nestes momentos a CTNL forma parte de:



- Comisión Técnica do Centro de Documentación Sociolingüística de Galicia (CDSG).
- Consello Municipal da Lingua do Concello de Vigo (froito da fusión entre o Consello Social da Lingua e a Comisión Cidadá de Normalización Lingüística, da cal formaba parte a CTNL)
- Plataforma Queremos Galego.